

九月末旬送綱齋往易州

恩湛餘齡結古歡
髻童知契尚金蘭
文章猶待磨礪定
尤悔相規藥石難
秋老幾曾經月別
歸程遙擬小春殘
却思行役關忠孝
下馬擎杯帶雪乾



遙擬小春殘

圭美堂集卷九

詩 五言排律

七言排律

送宋山言督學兩浙

敷教原家世觀文播 聖謨 恩光優舊德經術煥新
 圖井野纔徵士吳山又領儒茲行宣典訓不日薙榛蕪
 書義彛倫繫心聲禮樂俱燕臺先市駿滄海豈遺珠猶
 憶同桃李今慙別驥駑文章為案牘縫掖占官胥似剪
 溪山賜尤便詩禮趨清風原有閣藻鑑已名湖稽古方
 酬力初心詎肯辜政成膺上賞麟鳳際軒虞

都統趙公以勲胄累建戰功與平吳逆遂留鎮滇
南勤瘁以卒蒙 恩優卹未荷易名嗣君總督

河道積誠陳請 予謚襄勤為紀盛四十二韻

聖治先忠義人間有孝揚易名罕追錫鴻典會重光家
券山河在國楨杞梓良終軍雖弱小祖逖竟昂藏猛士
知神駿材官失蹶張大都聞股慄伊孰並肩行虎嘯騰
風力星寒拂劍鋌汾雲邊幕黑朔吹塞沙黃烽戍連巴
子車書走夜郎門庭容莽伏蛇豕更陸梁專閫雷轟耳
乘鋒穎出囊軍容新虎竹戰格舊龍驤惟有橫衝過兼

能決勝長子龍擠漢水充國制河湟浪靜昆明地霖蘇
劫火場遺氛芟草蔓作鎮固金湯蠻服銷頑梗虞廷肅
拜颺人欣冬日近天落將星忙忠武全無恨文淵已返
喪 帝恩誠悼卹天意想微茫不待公侯復旋看似續
昌父書羞漫讀先訓見於墻聳壑昂千尺超羣隘八荒
長驅輕定遠小試類王祥成績環江國高牙盡海疆名
聲依秦嶽寵重寄宣防春漾桃花靜秋平瓠子狂共稱
為代傑即此是家慶報本惟精白陳情向上蒼淋漓言
忱耳哽咽淚湔裳懋乃勲猶在欽哉篤不忘當年 褒

葬祭此日 予勤襄綠字宣幽宅丹心炯太常鼇頭知
 不朽馬革轉生香潛德孚公議明徵煥 國章法同貞
 惠合榮比順平強趙雲追謚順平 與國森貔虎靈山穴
 鳳皇義峯何崒岼孝水自汪洋寒雪陽和釀紹庭青史
 芳風雲推兩代日月麗三綱受者銘金石聞之滌肺腸
 聖朝留盛事千載永相望

恭賦 御製吹律考中聲十二韻

表影剛如度葭灰動一陽書雲標令節迎日爛 宸章
 因識天心正從知 帝道昌休徵符太史乙夜見羲皇

候變黃鍾合音調翠管香潛雷冲地氣玄酒味天漿希
 淡無為像平中有道將心原印周孔聲自叶宮商履節
 真相應吉禎未可量御龍回舊轡儀鳳下新簧辛際河
 圖見何須寶鼎祥禹陰方愛惜午漏正初長

鸛羽扇

鸛羽堪為扇編成意已幽參差還比翼轆轤自駢頭緝
 雉文方亞披紗薄共浮元規塵障少諸葛羽儀留本叶
 占風性應無執熱憂南薰長在手不羨五湖秋

詠新竹十二韻

渭川遺種在淨直出牆隅自有千尋勢何堪一日無涼
生風瑣細影帶月扶疎籜委文蛇蛻碧齊翾鳳梧參天
雖有待拔地不嫌孤截管雲門奏垂竿任子徒已能持
節槩漸可繞鷓鴣離憶昔栽移始辛勤畚鍤封泥平幹
本築隴護鞭鬚醉日仍探曆禎方預作圖平安勤有報
嘯詠始能俱雨露園翁手時時仗爾扶

賦得齊河千里曉橫銀

天際靈潮近無聲落九垓斗杓斟不盡風力砥難迴浩
蕩晴霄麗空濛曉霧開榮光分露掌素色接天臺濯錦

和雲亂浮槎舞雪來為章徵壽考多士仰昭回

送同門李思亭聞母示徵疾歸省

需次來京邑淹留歷歲時每因文酒讌欣把蕙蘭枝方
擬過無度何緣去有期眉黃鄉國盼心動旆旗隨雪舞
梅花粲江寒竹葉卮雲從望中近日向愛邊遲萊服誠
堪戀潘輿或可移清平祿養好為誦白華詩

紅苗歸化恭紀二十韻

再見堯天大纜知禹服長紅苗隨下吏赤縣到深篁雖
是寰中地難稱腹裏疆于今始開闢自古未馴良景運

關成命深仁見我 皇檄休傳父老策不用河湟慎重

持兵力從容固禮防惟移今鎮單誰問漢辰陽

紅苗本漢地舊

以五寨司為門戶康熙年改鎮移沅州總兵駐劄鎮單 遽爾千村出何煩五寨強

擎拳誓歸化斷髮永尊王恐後傾幽洞爭先躡複岡睢

盱猜漢語顛倒著冠裳近壤依夔子雄心失夜郎猿猱

奉丁帖鷓鴣訝封章異事騰書冊新聞詫職方天甘呈

輿衍地敢任包藏昨喜 恩無度 嚴綸官有常清風

共知爽戴日不分光保泰寧屯潤疑麻定繫桑從茲看

德讓千羽舞行行

春雨愆期 上躬禱黑龍潭甘澤應時恭賦十六

韻

未覺愆陽久深欽 軫卹頻疚心憐庶正奠玉肅明禋

尚顧齋宮逸仍催法駕陳桂旗前電繞芝蓋引雲屯曠

野暄無際靈湫儼有神誰能限三日便似應當旬繁密

初臨夜淋浪竟嚮晨鸛聲高永漏龍骨徧通津挑莢隨

時淡槐芽一色新清和宜導夏薄冷欲留春霧護青畦

嫩風披碧浪勻祈年先示兆樂歲定無倫舞學零陵燕

功輕版築人殷憂開化籥生意滿 皇仁饒有絲絲影

遲當杲杲辰萬方將獻壽會淨九衢塵

恭賦 御製烟輕柳未絲十韻

烟柳迎初候風光似有期等閒吟眺遠到處物華滋天際憐新靄臺邊認故枝差將青漠漠胡尚靜垂垂拂曙低山郭撩寒對水湄村炊任孤直草色並依遲薄霧猶嫌重東風且漫吹澹於騰野馬瘦莫鬪腰肢轉盼籠花潤旋誇弄日宜氤氲油幕膩爛熳釣綸隨回想春陽始彌欣大化熙希聲符太古待臘靜無為

缺

初秋 上駐蹕口外湯泉恭紀十二韻

秋省留溫谷邊垣駐耿光每從 天仗過彌識地靈長

雲護丹砂井烟含碧玉漿蒸騰龍虎氣歎薄蕙蘭香樹

接離宮影去熱河行宮不遠旌分獵騎行樂聲雜蕃部土俗問

名王晞髮臨魚檻風衣倚石床五行兼水火四序併炎

涼新德宜靈液寒垣即 帝鄉茸茸幔城地簇簇羽林

郎肯起驪山殿寧同洛水觴仍聞大風咏河漢仰 宸

章

西山積雪

瑞雪經時在西山入望勻罡風吹不散初日照逾新松

粒留天界雲容失地垠樓臺爭氣色水月亞精神幾道
泉為玉雙標闕是銀靜堪參太古清稱卧高人一簣勤
依案如坻兆取陳陰森生意足青碧釀前春

送許海寧宗伯致政歸里二十二韻

越棹輕千里堯年正五旬懸車明盛事樂志太平身有
美 恩華備無慙本末純 睿情留振藻儲翼選敦仁
化澤南邦雨官聯北闕春績成兼內外器利一亨屯自
上河平頌旋司地部緡六卿專爵秩再命典神人鹽鐵
希聞論文章擬返醇隱之無煖席叔達久嬰鱗稱得名

儒薦

薦自安
溪先生

完成下榻因

先生初下榻於
魏蔚州先生第

方儀威鳳瑞

遽與片鷗馴學想甘盤舊詩榮賀監新湖光鑑毛髮松
色上衣巾醉入耆英社閒垂渭叟綸詩書當歌舞禮讓
狎鄉隣客命胎禽報濤看戰馬駢棣華鮮晚照蘭氣滿
芳津廊廟深懸戀烟波 賜老臣引年符古義仰範重
洪鈞躑躅宮牆仞蒙茸藥籠塵願徵三老近早晚御蒲
輪

賦得潤物細無聲

微雨乘春令紛紛向夜陰已能宣木德不用借雷音影

落明缸小清分遠漏沉新塘舒柳線舊隴認秧針帝力
催三事田家抵萬金陽光雲外照隱識化工心

怡園楸花

舊德空齋迴繁陰落半區高花羣卉映危榦曲欄扶紫
萼輕疑墮清芬澹欲無點脂勻蝶粉抽絮吐蜂鬚暮響
疎簾碎藤垂別架虛城南餘咏在不覺酒傾壺

梅定九先生壬辰年八十大壽安溪師祝嘏有作

同人繼聲余經歲補獻三十四韻

文望北樓近靈源宛水長巨人寧世出絕藝得明揚憶

昔燕臺畔常依泰嶽旁大文彌噩噩陸緒起茫茫榮祿

輕三策中西貫九章賦言驚紙貴先生有璿璣玉衡儀賦傑作一時競傳

製重金相先生自製儀盤十數面思至神來告疲因樂

此忘發蒙工啟鑰開誨必傾囊異授仍修古真知喜共

商每逢花月地亦入咏游場棠藹三間屋藹棠軒在保定撫署荷

清十畝塘保定城畔有蓮花池藉糟如戀戀鬪句亦煌煌鄒衍談

無忤弈秋局對張寧徒畏精核到處有和光但覺餘歡

愛何曾見否臧逍遙榮啟樂擺落接輿狂諧世原無意

潛修自日彰上船 天子召操筆冢卿行舟次給筆札與安溪先生

同時試 帝謂憐龍馬雲書舞鳳皇身名隱猶見志業老

詩律 逾強別後山川間塵中日月忙慙慙新夢想歷落舊心

賜奉 詔元孫至欣聞八袞康紅藤雖在手白日不依

床祠壤貧謀徙困空餓救荒感歎真不已酬報那能量

宗黨今安堵新宮已上梁家郵來旦暮異數 賜賢良

鷹隼辭絛錠驂騑始服襄勞生遲祝頌期月念旁皇道

氣瞻猶紫秋花看又黃年頭過渭水曆面換昭陽逃謹

誠無計排嘲或有方少微承朗曜欲趁萬年觴

癸巳十二月廿八日 上躬祭太廟恭紀

聖祚垂衣久神宮合饗誠常時敦本始備禮答昇平

鑿路風威靜齋寮雪意清班聯齊象隊更點趁雞鳴連

扣霜鐘徹雙移蠟炬明從官微辨影步輦肅無聲玉瓚

三登獻雲門九奏成星光低劍珮松翠上旃旌香任墀

邊繞曦從殿角生嘉祥臻歲晚泰道際陽亨純嘏三才

會歡心萬國傾仍聞祈穀 詔親祭下春耕

安溪先生讌集命賦陶然亭秋望限韻

勝地公餘憩尋秋躡此亭流光隨蟋蟀遠意有榛苓雲

去山皆見颺生樹可聽已當辭燕社何處得鴻冥斷水

三美堂集 卷九 九
懸孤岸高城落半坳鳥馴時下砌魚靜不開萍氣識函
關紫眸留阮籍青露寒蠅掃跡風緊鶴梳翎意自無言
喻杯難到手停甘紅繙荔譜香碧試茶經豈是芳時短
渾忘明德馨清言各領取座右足箴銘

咏牆隅小竹用杜工部贈韋左丞韻

無心直節見不是虛空身除地何言陋栽根多用陳渭
川千畝種湘水二妃神弄影臨風好初移得雨親抽枝
將計个出笋不分隣碧管垂華藻青漿漱玉津丰標誠
灑落意味亦清淳自可銘勲伐何妨寄隱淪評茶開箬

裹釀酒賽梨春掩映籬縈蔓輕颺榻掃塵興言從有斐
弱植忘艱辛肉食千種鄙寒梢萬丈伸漫裁黃帝管倚
釣太公鱗王子期同愛文家覓寫真入林誠不厭改歲
喜如新歸動淇泉思餐憐大守貧楚吟雖戀越趙璧且
留秦蓼岸南山曲盆池漢水濱高松堪作友雜卉總為
臣良實雖嫌晚還期鳳下馴

壽父執高翁不危先生九十和安溪師原韻

耄齒欣初度賓筵浮綠瓜土風雖稍變耆舊未全差褐
服三親賴儒冠百里華猗胥聲色斂貧友意言誇小諾

猶盟券常令總法家頗如逐鳥雀疇與拔泥沙金鏤河
塘鯉紅鮮海市蝦晉觴方足繫祈壽敢心遐百歲吾歸
祝誰云杖履賒

送逢賡菴視學秦中

夙是王孫貴西掄帝里英玉堂 恩禮重寶萼孝忠并

聖意同謀帥賢材合彙征陽春占候早以十月冰雪向啟行

人清國士先秋實秦風本夏聲况當無戰日正有應際西師

獻囚榮胄子來佳氣用杜工部霜葭識古情用詩注

柔秦政成齊樂善思服詠周京山新學堂詩

庚寅十一月廿九日瑞雪霑洽安溪先生首唱命

同門諸士和韻

微陽七日後冬至至廿九應候六花真一色寒雲釀同看纔七日

大地新空明幾玩月清影未凌晨盡踏羣山玉旋消萬

斛塵牙籤仍闇夜冰署且閒身何自回溪棹徒偕立雪

人近瞻鋪冀野遙想徧江濱定以無螽告寧關秉火神

風先高柳絮氣結曲塘銀寒洵疇方若恩膏易不屯傳

羹鹽可擬郢客唱誰因高調韓公在驚看賀及民韓魏公有

忽驚盈尺及民寬之句題云壬子十一月二十九日時雪方洽

再和前韻

應候恩方飶凝寒氣自真清空心不染晃耀眼全新晦
夜疑生月嚴更訝早晨千山都有色九陌倏無塵殿角
迷烏影籬邊隱鶴身調羹鹽作味映讀玉為人道峻程
門裏思輕剡水濱魏公同得句田祖預稱神昨降蠲除
詔籌分帑藏銀 廟謨無或闕天澤亦難屯後樂鈞衡
意吹豳雅頌因 鑿輿東望去猶復省窮民

送張志尹前輩歸櫬常德

嶺表文星爛江鄉教澤留龍泉看利器鵬海絕中流疑

訝成朝禮功名祇泛漚春風號萬彙秋水失雙眸貧業
淒孤櫬羈魂下片鷗惟餘公論在清漢與揚休

贈同年芮錢塘衣亭

御李慚聯壁分符羨拔鯨一經原逸足百里又英聲冀
野應騰駿苕溪好濯纓用廉公作本乎上下惟誠強幹
千尋直真鋼百鍊精自憐禽慶癖特重潁川名言領洽
平要秋看景物清孤山梅韻古湖水鏡光瑩開濟高鵬
上睽攜朔鴈鳴海濱鄒魯近

謂安溪師

一節勉忠貞

排悶

天門客有夢已作十年醒淺障扶沙堞長河抱草亭高
鴻無近爪威鳳刷修翎香裊飛雲篆花開集錦屏卷中
味芻豢身外事浮萍五石瓢空泛千頭橘未青名安黨
人籍隱占少微星感物畦香草收心刻座銘芰荷衣粲
粲風竹韻泠泠天立無言教心輕卻老經醉從止酒得
琴向不絃聽神會原無際當前意萬齡

安居

半畝藏頭處羞人翰藻誇有衣空點墨無地復容花稚
僕塗煤字娥孫護草芽露香盤剝棗泉寫器烹茶遠友
來魂夢殘經老歲華占疑行有尚絃譜思無邪陋質誠
黔技竒情忽嗜痴影勾沙際弩幻惹酒中蛇皓月當頭
見浮雲未眼遮回甘親諫果不食玩匏瓜警枕鵲晨噪
薦衾蜂晚衙寶存平旦氣清夜足丹砂

聞鳳苞歸信

君歸期已定信至為陶陶海濶原霄漢身輕自羽毛月
移雙槩近風入一帆高久別髭鬚換端居寤寐勞護霜
留晚菊臨甕選南醪玉筍排姬穎金花亂薛濤所言非
世事得意共蓬蒿好客貧家過風流早自豪

喜雨

大德歸鈞軸甘霖勞鼎司今春何重幸兩雨總知時
杲頻愆望欣欣倍覺私輕雷抽宿本餘靄濯新枝
復助雲陰潤還邀霽旭窺擎看深盃滿掘驗一犁
竒農腹應高鼓厨婆不冷炊秋期為麥報彌眺盡揚旗

庚戌二月晦喜雨

雲漢憂何極青稞不肯長連朝空作勢灑響忽鳴廊
疎密終蒙霧虛徐已浸塘異雲崩陣馬暮雀噪饑糧
續蠟聽更永添裘伴夜涼沈沈滋潤意直欲理倉箱

春游十六韻

閒身真富貴春色大才華嫩柳離人態寒梅靜者花
換裘風抖擻輕笠雨欹斜鸝影猶藏樹蜂聲欲向衙
女筐蕨芽短村塾竹門邪帶郭籠山霧遙天帖水霞
驕騶破新綠側燕剪平沙背錦虛囊句頭網想試茶
詠歸樵唱斷暖塢酒旗遮疎落殘行鴈高低亂點鴉
慵情得緩步好事轉貧家義麗蒸移榻娥黃厚染葩
暘喉涼杏粥傳火耿牕紗松菊陶潛戀梨桃庾信誇
隣居東魯近遯宅面城嘉意願隨時足風光不用賒

辛亥冬夜偶成

十四年旋過時聞鬪蟻譁疎狂宜獨處閒散似浮家更
事恬亡馬探經勝倚麻點衣偏滌硯刺手復修花天道
常恢網人生詎有涯荒園纔半畝穩棲舊巢鴉

冬夜書懷

陋巷無多屋清閒不是貧家門城北似郡氏海東親儀
幣文堪賣垆醪月可賓世情今若古書味舊能新訟過
彈章泛高稱嬾病真江山空有憶儔輩殆無人發興漫
天雪懷恩大地春遠滇吾友在欲話道何因

以上
五言

暢春園啟奏內閣部院諸臣 賜食於澹寧居恭

紀十韻

官聯喜向衙朝早天上傳餐賜從臣豈有和羹參造化
只欣調膳播陽春香燈欲落千盤麗綵勝還沾百果頻
花萼樓中烟正裊茅茨堦下草將勻從容委佩留青瑣
步屨晴曛帶綠蘋山黛遠銜梅尚淺地光欲動柳方新
歡憑淑氣聯行袂飽看斜陽趁去人賸有歸遺矜滿橐
何妨隨侍浣芳茵三登已報豐年日四海恰逢無事辰
叨飫 聖明何以答幽風無逸競前陳

九日成綱齋招集友人黑窰廠登高限韻

中秋把盞渾如昨步履重陽約再申市遠已無灰作洞
 臺空隨便草為茵盤筵絡繹斜千嶂林樹蕭疎老四隣
 烏帽綠尊臨晚歲黃花白日暫閒身何妨小卧支殘醉
 莫試先行惹共嗔已近寒涼難後會恰無風雨亦前因
 羈懷怯報雞聲遠鄉思遙看鴈字陳定拚衣單凌冷露
 如吟花落餞餘春歡情又得逢開口好句誰歌換主人
白香山九日有滿把萸枝歸步緩年來發興此為真
當筵換主人句

鍾別駕洛瞻偕其兄進士勵暇見贈潯酒白菊口

占六韻招之來賞

勞勞戶外滿塵埃自守枯蟬昵草萊何地有花詩在口
 幾家無事酒盈杯松醪甕餉兒鶩色霜蕊叢分老蚌胎
 晚想山公騎馬醉預邀仙令駕鳧來勵暇待除邑侯胸中流水
 琴心遠屋裏青山畫卷開倘幸明年羞好客太白云貧家羞好客
 雪前還共一登臺以上七言

圭美堂集卷十

詩

五言絕句

七言絕句

寄暢園十詠

宸翰堂

錫山錮靈府佳氣團山楹雲章蟠太虛果然天下清

古銘

云有錫爭天下兵無錫寧天下清

嘉樹堂

在池上

素壁生秋陰古木羅階庇山靜夕陽時月落滄波裏

清賞亭

在澗上

時采山水音吾自有幽耳昨日縱孤遊朋來亦可喜

三疊泉

淙淙石籟響何以喧孤吟有時月明中來聽無絃琴

鶴步灘

獨行印鶴跡明砂亦綽約夜來羽衣人轉問吾游樂

知魚檻

魚樂即我樂莊生猶彼此莫問濠梁人知魚母乃是

卧雲堂

片片觸石來坐對檐牙迴須臾風吹開掛在古樟頂下

古樟一株為數百年物

天香小閣

不知桂有華爽襟開晴翠夜來登小閣閣中月露氣

清川華薄

素波去可即雜花遠難象叢叢生烟靄出沒風波上

大石山房

太湖家邊石開簾得蒼蒨當時醉吟翁辛勤移五片

題蔣西谷同門畫蘭

誰作幽人操竟為王者香清馨知竟體偶自寫風光

田家

池面高楊柳園頭翠竹枝遠山橫淺黛小閣最相宜

幽懷

庭宇沐清陰曉起澹無慮捲簾苔草香日日瀉蘭露
永日垂湘簾淵默入太素偶然紫薇花蜂蝶鬧無數
畫家貴寫生新篁影修修風來月下時反說文湖州
昨風吹花開今風吹花落開落年年春風那好惡
桃花女郎嬉花落實繁殖冰盤薦青紅何如花時色
三月無雨澤垂簾更掩門花事豈不惜春風多埃塵

隣翁早款戶野蜂先到廊牆垣遮不住風攪露蘭香
新筍竭河防燹木毀成器借問周子臆生意猶存未
園邊千樹紅狂飈驅飛絮瓶花隔重帟落盡無風處
澗蒼遮幽芳山中人始見裊石俯前流自洗春風面
新製蒿里聲殯者泣鬼語道旁牧羊兒聞作歡場舞
兀上古城頭遠草生微綠東風最關人不須儂歡曲

臘月九日夢中絕句

木榻閉閒神茶餘睡常短三漱九扣齒聲響臨牕煖

題陳軒成禪悅圖

三美堂集 卷一
輝赫宰官身儒佛不同調纔復悟因塵曾惹天女笑

題金北山雙桐小照

君殆示地文我恍聞天語聞是大經綸請看棲鳳處

以上

送張竹坡入都兼柬友

霜華菊蕊一籬新偏苦離情促去輪寄語主人花下別
可曾頻憶海棠春

京邸題董思白畫冊

蕉隱西河屋幾間數株松栢拂闌干故園隔在千山外

細把林巒畫裏看

海淀紀事

金盤擎得出 天家苑外傳呼飛鞚斜明滅雕鞍深樹
裏黃門分遣賜枇杷

宿芙蓉秋水軒步何羲文韻

微風纔度柳梢頭幾畝荷香一榻秋記取淹留清賞地
月輪東挂火西流

迎鑾曲

一縷金風萬寶成雲屯露積暢 皇情吹豳只訝豐年

雪不用來春再省耕

黃幕朱輪山翠長白雲紅樹滿秋陽懸知景物歸詩料

聖藻還添六六章

御製有熱河三十六景詩

荆南式廓有苗平舜日堯天再見明行樂應誇新部好

太常初譜舞干聲

鴈聲斗上送新寒直北霜飈到塞寬累日自南吹不斷

天風偏亦解迎

鑾

次第司儀禮上穹黃門飛鞚過塵紅預知心近螭頭日

先覺春生豹尾風

贈寧先瓶荷時餞坤掌南歸

丹日扶疎麗五枝吹塵量水注軍持那堪折向同心客

惹取離情入斷絲

癸巳夏日安溪座師蒙 賜玉泉山泉水日兩器

謹次湯院長原韻紀事

涵水曾驚驛使煩春波併注沸湯温

師前歲患瘡假浴湯泉又命馳驛

取海水洗之得愈 那知東海無邊澤又酌西山不竭源

真贗還能品別無中官 嚴詔下行都

旨敢撓入別水者罪至死

故知綸閣冰心在日日雙清照玉壺

微傾似滴千花露滿注渾疑一片冰簾外暮聲七碗過
應教六月失炎蒸

注鼎流匙溢玉漿薰風高颺教忠堂

堂名御賜

別看點易

酬天眷和墨研朱倍古香

題西谷畫瓜

扈蹕口外所繪

龍蹄虎掌艷沙庭翠碧堪思沁齒馨應陋漢皇冰谷賜
新分哈密兩丸青

題秋山畫幅

寒清骨相更穠華林晚憑君絢彩霞試看霜棱含五色

莫將秋樹認春花

穆益之四兄天姿英挺聞過喜動顏色余閱人多

矣此真畏友也冬夜不寐口占兩截句奉贈

以自嘲

人人護疾自膏肓二豎因能避扁倉今見霍然無所心
孔門高峻看升堂

絛錠前軒未解鷹碧霄萬里羨君能講堂落盡天花雨
却笑遲回蹇步僧

白溝河雨後題壁

三美堂集 卷一
柳行濃綠麥畦新紫燕輕颺云國人莫道浮雲空蔽日
春林一洗十年塵

早行

野草香生帶露風一輪曉月萬山空雞聲獨報前村靜
無數居人在夢中

京口憶舊

康熙乙丑余負笈從金壇高高齋先生讀書鶴林北
固間今三十餘年矣江山在目舊感盈襟因賦五
句

常隨童冠狎風雩棹撥丹陽酒一壺記得橋頭豐樂館
麪盤問有八鮮無

高氏甥孫虎兒十歲

小字還應魯直題百年電影過旄倪勤脩須應陽元相
肯道巢兒類鎮西

清宵白日莫蹉跎十分期齡一分過漫道讀書千萬卷
身心密切本無多

舟夜

夜深江冷透衾裳板縫條條雪月光夢覺不知身遠近

枕邊時見一痕霜

連夜夢安溪師綱齋寧先湘芷義門大山立侯感

賦

聚散存亡來去風知君若箇賦幽通平生師友淵源意
盡到篷牕一夢中

口占

昭昭何事信心銘漫向人間說玉京白晝深宵無兩樣
只愁當境不分明

贈綱齋侍史色勒

蠻竹名驚澀勒聞

東坡詩倦看澀勒暗蠻攢枝短節瘴

烟熏奚兒恰應南交識小字還應贈籜君

上元簡綱齋

牙牌六載久追隨只向王孫怨別離老去東風渾忘却
紅牆碧砌小桃枝

海蠟羹盃荔子杯潭潭東閣為君開六街簫鼓燈花鬧
細聽先生講易回

老去花燈嬾與親犢車煩駕短轅春踏歌隊裏金波滿
艷逐香輪碾暗塵

膝上冬郎坐擁扶歌聲已解辨吳歛鳳毛麟趾原英物

近會拈毫著句無謂嗣君伯厚

楚遊每遇名勝輒懷赫尚書即用見寄原韻

寒谿

黃州對岸果幽尋坐看雲容聽水音獨向遠公橋上望
非君誰共愛山心

赤壁

夢裏猶尋鶴化人春風棹與長公隣何當細雨梅花夜
共汝寒燈對討論

峴山

重君五百可當仁峴首青來際九垓若使管簫江上駐
亦應墮淚有荆人

萬山

杜公祠畔富山容竹靄拈毫似此峯潭涸碑沈無半字
淡雲籠日過疎鐘

習家池

四山撲翠遠江秋白鷺窺人踽踽愁惆悵此生逢此地
同君一醉復何求

復真觀

雲深古院滿詩思
遠落甘泉桂樹枝
月上想君同坐處
調琴烹茗爇香時

武當山頂

蛇盤鳥道鑽雲上
碎礫千山線巨川
不敢層霄共飛步
知君怕近九重天

無題

豈寇籠牕鎖笑譁
雪飛萍合未還家
朦朧昨夜燈前語
怕向風前紐夢花

武勝關道中

山翠重重帶曉烟
故園春色想花然
半枝纔放山桃小
為報風光到馬前

羅山

紅山綠樹僧繇畫
斷岸江流蘇子文
最愛先生讀易罷
一帆落處坐高雲

湘潭道中

一路溪山縱嘯歌
淹留是處好盤陀
無端向夕乘風便
多少林巒夜裏過

初秋夜

吹殘燈焰月朦朧清沁芽茶夢不終披得生衣香半冷
豈花雨氣入簾櫳

癸卯夏日遣興

瀟瀟風雨友聲殘一卷書開九畹蘭插得餅花聊稱意
隔屏呼出老妻看

清光一片守靈臺鎮日無人破綠苔瓦雀聲中花影重
隣家蝴蝶過牆來

宿白門城南樓

龍虎頻瞻王氣重金陵文戰憶遭逢麻衣三十年前夢
又聽南朝寺夜鐘
武定橋頭曉望情初陽塔頂霧中明小樓半夜朦朧月
疎雨時聞碎瓦聲

慈湖道中

太平景物靄晴暉擔子行來擁翠微塘裏荷花塘上藕
老農閒看稻苗肥
楊柳風來草綠平堠亭苔印槿紅輕農人萬寶無餘地
荷葉荷花礙路生

入績溪界

琉璃屏障綠如油中有懸泉百道流龍尾硯材何處璞
玉波時見一泓秋

拾菌

青林宿雨曉模糊一杖清風路有無松菌雲根擎五色
何人解作采芝圖

宿星岳寺樓

一撮靈鼈擁翠螺琉璃千頃浸盤陀何緣白日丹青夢

直踞蓬壺弄海波

一名小南海

宿煉丹臺示王不字

萬仞靈空雲海關雲歸並見海波還勸君名教無邊樂
只在三山二水間

和靖先生不易攀鶴聲梅影至今閒孤山靈境人人有
漫說何方可閉關

題黃山僧柴村畫幅

雲海茫茫望若真桐江西去碧嶙峋分明記得前宵夢
我是圖中策杖人

題雪莊大師遺像

孤雲寒月仰高蹤
遲我芒屨竟未逢
五十餘峯公面目
更於何處覓真容

不獨河淮稱郡人
睡翁先子本同羣
通家孔李空相憶
只見青山與白雲

曉過甘懷園

軒楹敞貯露華光
曉起人來滿院涼
隔舍蟬聲喧座客
平疇草色到華堂

松門精畫理
酷愛赫司空
作以為不在
王婁東下

余轉贈枯木竹石小幀並綴截句

高尚書後赫尚書
粉墨紛紛總不如
檢寄松門兼別意
年時落木九秋初

陸冲霄先生題東方偷桃圖壽高衷禹戲題

名章家寶仰前修
避世金門誑道流
我有蟠桃不滅種
憑君億劫莫能偷

乙巳初秋遣興

夜半輕風颯露華
誰將寒意到山家
朝來耐得秋容瘦
爛熳紅薇一樹霞

小園

過眼雲烟閱歲華朝來物候訝山家紅薇疎蕊秋將晚
春海棠開一樹花

秋深餘熱得清涼靜向高天數鴈行襯貼黃花明晚節
多勞昨夜一庭霜

題赫尚書寄著色大幅山水

雙眉開處夕陽亭一棹懷人下遠汀渾似移家江上住
當門常對數峯青

又題小幅水墨山水

竹叢藤緘到山居水色峯容落木初氣韻小堂空翠滿

高尚書後赫尚書

夢一友似向日曾在吉水李宗伯幕中別去寄詩
與友言同客時一韻事為歡

內侍宣盤惠果來絳帷寒處畫屏開仄頭啖盡人無兩
一曲春風自撥醅

夢中句

自是青天在上頭人間萬事總悠悠雲開一片千山月
常向胸前掛到秋

丙午春日偶書

光陰應向五湖寬
劫劫常驚歲易闌
最是連朝忙翰札
杏花開滿不曾看

長日讀書

龍團香破眼朦朧
一卷殘經味不同
墨似漆光牋似雪
隔簾時透棗花風

題松門為余作畫

堯年洪水汎崔嵬
何處山堂失溯洄
今日含毫開面目
故人排闥送青來

題觀瀑圖

獨立囊琴倚赤城
誰來高望濯塵纓
天然寂靜忘言處
雲湧雷奔萬古聲

松門畫折枝淡紅
牡丹贈吾邑守戎
祥符劉介社
索題

輕霜抹得趙昌神
何似香風起玉津
十二闌干鄉夢短
小牕時占洛陽春

惜陰

雖無塵事也忽忽
不向研經嬾慢同
小睡鷓鷯驚簾外影
薇花又是一年紅

貯水

淪茗天泉子細收

音拘挹也

揚味在熟中求

揚至干過味久不變謂之

熟水朝來倒瀉銀潢罷靜聽兒童唱水籌

題金北山藏王石谷畫冊和原韻

貌得家山是輞川芙蓉面面倚湖天閒牕一接風光好
已道塵中蛻骨仙

七月伏汛水小退三弟新號水村嘲之

西望兼天海勢翻漂搖猶幸一枝存堯年費爾閒粧點
瓶取幽人號水村

年來高唱度滄桑例作詩人笑欲狂五鳳蠻牋應寄汝
新銜抵署水曹郎

題安東茂宰念峯先生課子圖

公餘經課竹牕虛雛鳳翩翩繞玉除胸次灌湖三萬頃
琴鏗鶴夢掃花初

閒常鄉思入雲亭金粟叢生訓鯉情雜誦鏘鏘風過耳
玉球一十六枚聲

題曹仲經小照

世情厭老莫傳真荷葉楊枝幸共新記取初逢花映肉

於今俱是白頭人

友人為明妃詠者用其意成一絕句

青冢芳名千載垂也應多謝畫工私當年買得椒房寵
面面春風是阿誰

幽意

鎮日無人鎖戶幽湘簾不動几光浮誰家白蝶娟娟下
半院黃花塌地秋

丁未春書意

繁陰青子過東風孕育深深造化工最是人情徇眼色

不看濃綠只看紅

早起

春深睡足心無事殘夢迷離眼似遮乾鵲一聲窻有日
汲來新水注瓶花

首夏

簷下風清乳燕譁輕曦先照野人家膽瓶新水朝牕淨
自拚堦前帶露花

秋意

蘋末風吹初瀟茶小窻閒靜月痕斜女娘預戒兒童戲

自數庭前茉莉花

秋日題四季花畫扇

金粟黃收火燄紅蜜房香引點硃叢殷家頃刻無邊巧
都在先生掌握中

種花人詞

城東十里沈家屯我住城中似比隣自有幽情來結契
太平時作種花人

流陽張茂節令大興歸工時菊流傳吾邑遂為方
物詩以紀之

菊幻新奇別作苗張園流水紀勲勞鏤金錯采天裁錦
怪說秋風似剪刀

閒坐

茶烟散盡一庭閒九點青來畫裏山細雨作聲微撼菊
牆隅風在有無間

戊申春盡

春去尋春共說遲陌頭心繫柳絲絲歸來竹屋銅瓶裏
猶有緋桃三兩枝

簡張詰士

無聲詩和不絃琴自有移情擲地音說與旁人誰得解
轉疑聾聵是知心

北苑南宮繪事傳心師造化是真詮分明大地河山在
坐老宣毫粵硯邊

枯蟬銀色印殘行方寸靈臺無際光舊事由來盡新得
滿天明月一簾霜

閒意

臘到門中日退行數甃欲展課書程誰知老眼朦朧處
纔對梅花字字明

己酉立春前一日

欣欣草木已知榮明日蒼龍整駕東唯有皇穹無世法
自朝吹晚饑寒風

曉起

湖雲朝暎雨踈踈夜氣充然一卷書最是青蓮著句好
幽簾清寂若仙居

程玉亭以監賑來吾邑報績而返出照索題為占

一絕

把卷囊琴百慮先竹光蕉綠柳陰天到來堯舜溝中意

本在吟風弄月邊

胡良翰惠潯釀二罇旋寄綵牋六束謝之

若下雙瓶玉色多
簾光雨歇泥晴和
紅薇一樹人何遠
故夢空思卷白波

寒鴈初過河鯉回
故人緘素重瓊瑰
江郎昨夜雙毫去
媿爾蠻牋五百開

辛亥夏日題馬嶰谷涉江兄弟家藏倪高士竹木

小幀

占得玲瓏山館清
祇陀竹木午風生
游神果與天相會

萬古寒烟夕照情

即用雲林自題竹木畫句

天香妙蹟枕函留

予家藏高士秋林野興圖真蹟吳文定題句經鉏堂前水犀黃何人晏坐

聞天記似前身閱閣游
六月蒲葵無處著
山堂又借一

痕秋

即事

秋鶴難禁警露聲
高鴻去去與雲平
城中只少青苔路
獨就荒園踏月行

壬子六月十五夜夢友以海石三片合為小硯屏

以贈澗紋沙脚色
色宛然醒後補成絕句

神峯三出硯屏新
海若靈飛縮地頻
蝴蝶夢中風引去
桃花流水自秦人

立秋

火山赤坂喘無休
簷影南深一尺優
葵扇暫停初夢穩
半牕涼月一痕秋

寄唐益功司寇

濡毫把卷壓賓筵
客裏春軒敞靚天
柴廠風清今並老
紅梨花下是何年

浣花溪畔思嚴武
鴻鴈天邊問達夫
待得調元愜歸興
可能倚棹話菰蒲

寄穆益之

相知意氣果相傾
四十年心不變更
上馬石邊槐樹老
西華城角夢中行
裊裊鞭絲歸岫雲
戒臺特往話離羣
西山面目應如故
十五年餘不見君

書李樹菴篆書冊子後

薤葉芝英體製紛
君家丞相本凌雲
嶧山磨滅徒形似
鋒勢今看玉筍文

題汪上章觀鴈小照

萬里秋晴一鴈知
霜飈欲下晚江遲
詩豪湖海無邊意

滿岸蘆花倚棹時

以上
七言

歙縣四詠

江村

綠樹青山石砦板橋竹屋人家不見冠纓綺縠各勤井

臼桑麻

高橋

場角雞冠更紫籬根龍爪偏紅流水聲中細雨稻花香

裏秋風

漁村

隴畔黃禾一片岩間綠樹千重茶竈就溪魚過機輪旋

磨雲封

小溪

屹立巉岩千仞清寒潭水一泓雨沐羣松歷落雲開遠

岫崢嶸

以上六
言附

圭美堂集卷十一

序一

片雲集序

士子省試以所占經為一同考薦者謂同門視同年友尤親密余丙子試京兆及副額同商邱宋子山言以毛詩出左蠡吾夫子門已卯鄉薦則同出行唐張夫子之門者有常熟蔣子酉君山言酉君俱以詩名海內余不能屬一語則余之陋也今年正月探梅至姑蘇山言侍府公讌余于署館酉君在焉不數日山言歸商邱別余

以小詩甚工酉君約余遊山比至而新刻片雲集竣事
遂命余序之余不能詩烏能序酉君詩雖然酉君言之
矣謂立言者宜讀書貧兒逸諺不事生產而無名之費
日有出而不見其入勢必至於踵決肘見而不可掩又
古人文必相題乃言有體式等尊於卑則褻加親以疎
則漓處憂患若歡娛則悖推此而論則呼吸微眇變幻
恍惚當其情事相觸類物相肖形真有兔起鶻落稍縱
則逝者故言有物而機緒日新未有苟於是而能自存
者今讀酉君之詩見其材之富則取之武庫大府而不

窮擇之精則匠人入榘楠豫章之林而拔其尤詞之達
則萬斛源泉放乎四海而出之不竭及按其質文相儷
言必稱情意不浮事婉不匿旨直不傷雅馳驟而中度
蘊藉而多風雖難於立說者亦莫不傳其曲折而合其
節度乃恍然於酉君之語曰嗚呼盡之矣酉君所以為
詩者蓋學之博而問之審非偶然也豈耳傭目剽黷預
粉澤而徒游光揚聲以欺人者哉余以酉君語序酉君
詩始終見余不能詩且期他日學詩將奉之為科律不
敢頑然以不詩自別酉君越月即北上當先晤山言舉

此論之知必不廢啞然一笑也

送成陸鄉令南安序

鹽城成子陸鄉高才有豪氣盛年魏科筮仕得贊皇單
騎招山中錮盜導

天使入飛馬夜馳嶮巖仄道無所懾盛暑七日夜不解衣
遂卒事以出初

天子以令書生

勅大吏視材者調易至是使者言於大吏得不調俄以同考
京闈聖吏議去今年用例復職補福建泉州之南安南

安山海輿阻俗譎而悍猾魁多產其鄉地大於贊皇而
較稱難治夫邑無大小難易以陸鄉之勝氣何事不可
然余獨不欲陸鄉之恃此氣也氣合乎理則出之有緒
而應之不窮氣逐乎事則意念擾雜而機變紛起方陸
鄉之治贊皇也今相國安溪先生實巡撫畿甸余累年
侍先生側見其廉靜寬慎銷華剷名就循常規格中幹
轉為利益訖有成績而人不知時陸鄉發弁卒之奸牒
訴不已先生頗訝其刻露今南安與安溪接壤陸鄉造
問土風之宜政事所急先生酌古今度時勢而為之言

陸鄉折服即投贄固請為弟子枵然忽喪其所有皇皇
乎如有所跂而弗至余於是歎賢者果不易測南安可
恢乎游刃而有餘矣歐陽子曰吾寬不為縱簡不為畧
文中子曰恭則物服慤則有成平則人化皆不尚氣也
夫氣下則心平心平則細入乎人情暢通乎物理必能
廉以約已儉以持家感人不徒以言馴暴不徒以刑昔
子賤宰單父夫子問以治狀最後乃曰此地有賢於不
齊者五人不齊事之而稟度焉夫子歎曰賢者百福之
宗也神明之主也惜乎不齊之所以治者小也然則陸
鄉聞先生之緒論而施諸其鄉則孔子之所歎者也先
生薦賢為國自其鄉始如黃潁川賜爵加秩入代丙吉
為相余於陸鄉有厚望焉彼道山川花木之美人物之
繁盛土宇之廣濶皆所以頌俗吏非吾徒之言陸鄉視
余厚不鄙余之不文導之使言而因以衷懷進

賞詩閣小集序

今入仕之途甚賒而士子既業帖括率以出身科舉為
遂其初志故挾冊試京兆者人既浩穰而渝濫之弊間
出不得者濡遲羈孤中類托吟詠以舒其悵忿不平之

氣觀者往往疑其干澤而釣名為修諸已見其大者病
焉惟吾友陳子季方手一編示余乃新錄詩五十九首
即唐入所謂夏課也今讀其雜詩如賢哲豈無憂慷慨
非身圖日月不待人為君惜居諸古人重名家所貴有
專門卷局固難大蒼翠得終古貯為雜佩贈勿輕羨多
珉本無汲汲志豈為晚晚憂三月一日作企古有真賞
茂末培其源榮華苟眾芳顛顛非吾悞病足作雖然偃
僊遲亦致修途躅爭先豈無意蹈險非吾欲題紅毛刀
子平生恩怨少好好匣中收送蔣子遵云好友頻來書

滿屋人間得失總悠悠芍藥絕句買取一枝瓶裏供井
花水冷少塵埃皆厲志讀書息影畏人若於東塗西抹
外尚別有事在余與季方游最久悉其愿樸少緣飾非
駕虛說以自高也至其根柢講貫既專且久而淵源哲
匠周旋於鉅人先生之側故其成就者超然自遠他日
賞詩閣全本問世讀者必能辨之茲特論其小集之異
於時俗者如此云

送張仁趾總戎之任威寧序

不次之恩必得其人則予之受之非私且倖予之者非

私然後可責之以盡職受之者非倖然後有知己之可
感張君仁趾之得總戎事於威寧也備斯義矣余貫宿
遷仁趾徐州為同里壬子歲同受知於簡謙居先生屬
博士弟子員籍至訂交則丁丑春二十年情好日密如
同懷然仁趾頰面虬鬚偉軀幹篤於孝友好義輕財喜
立事尤善譚論余初見於京師鹽漬宋子穉恭寓說其
遇饑歲貸官粟開河數十里一方賴之其畚鍤錢鏹皆
有方畧程度掀髯抵掌之次鋒勢四出莊諧竝用風發
而泉湧與人訓對工為翕張伸縮取其機籥而抵投其
間隙擘斯得理洞然中的巧捷時出意外聽者洋洋然
神舞色飛有窮日竟夜而惟恐其說之盡也會試屢報
罷効力兵部考滿隨河道于公出今冢宰張公遂任用
因招鹽猾孔文泰見嫉於淮揚道王謙又所管葦蕩營
災鐫級追賠進退窮蹙癸未

上南巡走伺

行幄會選閱河嚮導官輒挺身自任

上一見稱能

命為前驅

問水道源流閘填廢置之宜悉稱

旨免其例賠物料扈從入即授京營遊擊許於

鑾輿往來得接送益異數也余丙戌抵都仁趾陞參將見其汰疲癯覈假冒除戎器練卒伍明賞罰凡捉捕救焚自出心計皆精密捷敏發姦摘伏人莫知其所自豪猾倚恃輿援橫肆於市者能用剛柔操縱得其機要而折其角苟所不可雖上官莫之奪要其卻暮夜之金於士伍之餉絲毫無所苟賞募一捐已俸故人畏而悅之而訖免於禍也戊子陞臨清營副將今年春乃有是

命余前輩德州孫侍講曾提學於貴州急走問之云威寧萬山叢立面皆西若背中原者故為蠻夷君長之地官其土者一無所事總兵受苗民詞訟貨賄所出理於知府者反少近知府以術鉤致文武方相水火而余亦北轅矣仁趾疏請

陞見

天子允焉凡所以涖威寧者稟

廟謨而行之足矣要領在於潔已而愛民不利其所有則胡越一家至設官分職所以為民民吾民也兵亦民也苗

亦民也養之教之地有中外俗有善否人之心無二也
天子兼容並包一視同仁故幅員之廣亘古未有近復以提
督為總制合文武而為一不欲區兵民而為二大臣任
封疆識其遠且大者在仁趾勉之而已

本朝文武均重總兵之選

帝心所慎雖勲貴之胄仰望終身而不能至以或束髮從戎
身鏖百戰名登壯士之籍骨無封侯之相如腰鑣牧豕
形諸歌詠卒之槁項黃馘以老牖下者何可勝數而仁
趾一武舉人望百夫長如天上况負焚章數十萬求為

安居貧民將不得今擁八座之尊建牙吹角兜鍪擐甲
弓韋服矢插房俯伏道左趨走而唯諾者皆將官也倘
始終不一節措置乖方人將笑仁趾以口舌得官不中
大用上累

聖天子知人之明其可乎仁趾行矣王右丞送李睢陽詩曰
布衣一言相為死何況聖主恩如天請為仁趾誦之

送汪荇洲學士視學浙江序

今仕宦多途而人率以進士第為榮進士由館閣出典
鄉試及視學為尤榮蓋嘗業於是而涖其事焉故也獨

三美堂集 卷十一
於出身之制義則鄙而賤之以為無與於學而不足傳
士大夫所見類然韓子曰學所以為道文所以為理凡
文學皆如此而况制義依四書五經以為學肖聖賢聲
口以為文者乎雖然如時人所謂制義亦無異乎其鄙
而賤之也制義自洪永逮嘉靖初義理恪守集註取材
於五經性理道德一而風俗同其後以詭說汨之人為
講義而文亦佻小破體至啟禎間怪雜昏悖妖淫愁怨
之意作而國事蹙矣我

朝制義凡數變尚未能復成弘之舊安溪先生闡經書之

奧精心於周程張邵滙朱子以集其成而制義持論反
所自為一以成弘為則總憲武強劉公讀先生書深信
篤嗜之年踰六十精進不已遂登堂而入其室苻洲汪
先生於兩公有通門之雅深潛純懿講切慕好登第已
二十年而制義日程月課如兩先生之為者去年

萬壽開科列典試浙江大臣舉先生名

天子允焉既得士有聲而程文為十五國冠冬復有浙江提
學之

命士林以仕宦華貴為先生榮而吾獨慶正學之將盛也夫

士學之不正由於制義制義之不合由於亂朱子之說
亂朱子之說由於姚江王氏浙之山自梅嶺而東北勢
逆而力厚其人多偏駁好異而不軌於中庸故節義事
功文章之士不乏而學術未純不獨姚江王氏也呂東
萊陳同甫葉水心陳止齋輩當朱子之世且有齟齬不
合者其他無論已今

皇上親纂朱子全書躬自讐校書中發明四書五經者
命禮部先發各省照刊頒布知先生必能令浙之人士講貫
熟復發而為文力追經義初製安溪武強既為倡導先

生順風之呼出素學以正士趨令其所好尤易從將見
天下正學之興自浙江始而浙江正學之興自讀朱子
書以正制義始余忝同館末行夙沐先生教今誣行有
日不敢無一言以獻又

御刊朱子全書不肖承乏校字與有榮焉庶亦不忘職守之
義云爾

送陳秋田任長寧序

余早歲聞秋田以能文名今知其令於荔浦凡七年蠻
獠化外之地農安於野兵易於伍椎髻之童子向學胥

吏皆橐筆就學使試而深林密箐頑獷之盜盡誘其黨
摘發鉤致之入版籍帖帖然與秋田同事於其上者每
臚舉而羨其能不獨秋田述之疊疊而有味也秋田容
寂靜而氣和其言語詳緩有條理精神收斂而警發與
人若汎愛實悉知其性情材力之所宜故與之交者各
得其意之所欲其臨事也亦能有所不為以此知人之
稱其理荔浦也不妄服闋補四川叙州之長寧險遠荒
瘠與向之荔浦等送之者為秋田惋恨以窮困蹇躓有
不可一日處者夫秋田以寒畯起家進士其窮困不由

荔浦也則自今以往之窮困豈由長寧乎至所遇之通
塞有時目前所值胡遽以為感感哉人之所處未有無
所當為之事者一父兄之所命一朋友之所委就此一
事尚難以言無負况百里之民人社稷豈無吾職分之
所可為與吾力之所能為者益事莫不有不易之理而
理之分量本無窮理具於心逐事而求其合則心亦盡
於是故嚮道而行常有躍躍於前者引之而莫能至則
身亦隨之而不能自己久與之習巧智有所措庶幾機
應於心不挫於氣者其苦也茲其所以為樂則外之憂

虞艱阻視之漸輕漸無韓子所云若築河堤以障屋雷若水之於海冰之於夏日若奏金石以破蟋蟀之鳴蟲飛之聲孟子之必有事焉大易之安土敦乎仁皆謂是矣秋田倘以長寧為感感而視為一日不可居則不應以所以處荔浦者疊疊為人言之也余知秋田不感感於荔浦故因以是續之

南厓集後序

虞山陶子師先生甲子舉於京兆戊辰成進士時先生制義行海內余驚怖其文之才氣媿莫之能學繼聞令

璚之昌化諸所蘊負百未一展而竟卒於其官嗣君貞一登壬辰榜與余同館未幾以覲省去今迺得與其仲子貞靖相游處因獲見先生所為南厓集者集中申牒書疏皆為子遺請命語附以與人簡牘之有關於此者並及邑乘雜文數篇而以浮糧考終卷蓋邑中之蠹害多端而最大莫若浮糧世之牧民者其意率不相關或有其意而選悞畏難又或者考之不詳言之不中類不能有所為今先生於其職有不容已之心有必為之氣有能達之辭况蒞荒徼遠陬蠻烟瘴雨十無一生自知必

不能免而於求去不得之日呼籲哀禱不啻身在湯火
斯亦奚媿古人夫浮糧為害百年之久官徵已蠲之課
民輸無田之糧邑將空矣官斯土者上下恬然先生請
命不得勢窮力竭猶撰浮糧考一書遠稽旁搜鉤索研
覈至荒渺之情事瞭然如指諸掌蓋有來者焉將旦暮
俟之精衛填海愚公移山推斯志也與日月爭光可也
先生之言曰上下相遁於文法之中上姑以此檢下下
姑以此罔上是固不止一時一方之憂又曰天下之事
有治人而後有治法天下之法有實心而後有實政雖

古人所常道而出之警動此豈徒文人之言哉嗚呼其
可敬也已先生著作尚多謀先雕此行世固善先生在
官凡五年而浮糧考則殫精畢智盡二年之日力於此
當其求明佐不得踽踽徒步於北城荒寂處忽於蒼翳
榛莽間得徐令斌暉之碑似有神告者貞靖云

送蔣子遵之任廉州序

吾友蔣君子遵以戶部郎中秩滿得守廉州歸壽兩尊
人因訪余於河濱懇懇乎回路之請贈也蔣君自束髮
從學於義門學士及計偕又游安溪先生門為經義唯

先民是程沈靜溫良博通史傳要以經書為本講切專
且久在戶部數年以清慎勤信於曹長而聞於

天竊以為士之用世

上所以敦厲之者甚至而下之術業不明率謂所用非所學
其用之者又恐非所習與非其時君行矣廉處蠻獠中
山嶮瘠薄上官無所誅求

朝廷不采珠椿靈萱茂晷影舒長君優游暇裕以平日之
謹潔為化導基發篋讀舊書即以己之治經義者為治
棟所屬士子有才行夙望及幼而聰敏醇厚者數人教

之治舉子業講明四書及傳注讀宋儒切要書為文祛
俗濫趨雅正本經外通二經或四經務使真知所決擇
果心悅而意得只一二人便足為種子冀滋蔓於無窮
也夫舉業者誘之以進取則樂從投其所素習則為之
不難士者民之標準也文者士之精華也經書者文之
根柢也而經書之所載則聖人之道而人之性也道者
職分所當為而性者人生所固有當為者體順心安而
不可易固有者善同類應而不容已潛牖其愚蒙而默
教其頑獷有莫知其然而然者孔子曰速於置郵而傳

命豈不謂是哉前年余游荆南銅鼓趙孝廉炯為余道黔楚之峒苗近皆知延中土人教子弟以詩書日供米薪雞卵及節候誕日亦餽餉俱有品致疊疊甚悉雖其俚鄙睚眦可笑然欲其子姓通文義知理道一也今民不見兵革三十四年道化翔洽

當宁崇闡孔氏之教本之躬行心得而鉅細顯微靡不周備傳所云洋溢施及凡有血氣者莫不尊親茲非其時乎自秦漢迄吳逆之亂此方被蹂躪荼毒者不可勝數韓文公所云撞搪呼號草薶而禽獮者非今之時也及其

自至潮乃為牒置鄉校請所部趙德秀才為衙推以師之可謂得其要矣以君之文行奉

寵命以往適際此時似非偶然者君乘時為之用其所學行見政成

內召過吳門綵服春酒為親賓說教化之行人材之興風俗之變洋洋盈耳余雖老尚庶幾及見之

顧嗣宗帆湘集序

為文者欲文之進於古而第於文求之恐終不能至昌黎於此言之為詳人必志其遠者大者篤於人倫務正

學明其理博覽精思通古今經世之要區別人物之高下復講切于文之體律與所以修詞之法及為之也必有為而為所以為之者緣物稱情而毫無所溢飾庶可企及於古之作者惟詩亦然不爾第以詩論太白之才力豈出杜陵下哉吳門顧子嗣宗余向嘗晤之於京師見其詩歎為雅音今年春相遇於同年楚學繆子澧南鄂州使院中澧南以公明冠十四國其幕友極當時選顧子與焉楚地廣濶西入秦蜀北界豫東北至江左右西南際滇黔南抵桂林象郡矣澧南善為詩使車所到

凡山水之曠邈靈竒古賢豪之遺跡題詠幾徧率與顧子俱五月下旬顧子將歸省覲赴秋試乃出其楚游帆湘集索余一言弁其端讀之累日情文斐疊意適而辭洽雖有豪宕之篇秀警之句一歸於從容泳游瀟灑自得今之工詩者未能或之先也顧子年逾異稜尚困躋諸生中寬分綽分無幾微悒鬱無聊之色筆耕硯穫以奉親而教其子其鄉之先達何義門每為余道之陳子季方余家季澂齋皆與為至友江浦劉前輩大山昔亦屢稱焉似不徒以其詩也於戲此詩之所以彌可貴也

余在荊州與顧子同游龍山寺休憩後閣中解衣磅礴
為余論詩與余所謂求進于古不當僅求之詩文語有
深契由是推之其所學詎可測而所詣烏可量哉辭之
不獲聊述所聞於師友而可以推闡顧子之緒言者以
相質云

